

KALATE A NGA TILIBAN MFA'A BEHÉBRU

Zambe a nga kobô e be Mone wé

(Yôh 1: 3, 14; Fil 2 : 6-11; Kol 1: 5-17; Behéb 10: 12-14)

1 1 Zambe, nnye a nga kobô bemvamba e melu kôa biyoñe biyoñ a mezene mezen e be bekulumejô ; 2 ve e melu m'asu'ulane mana, a maneya kobô bia e be Mon, nnye a nga telé éjian mfa'a ya baa biômô ase, amu nye a nga té de si nyô. 3 Nye ate a ne mfaéane ya étôto'o jé a eyeka'a ya jôm émien a né, a ba'ale biôm bise a mejô ya ngule jé. Eyoñ a nga mane bo metuna'a ya mam abé, ane a nga tabe si e mbonnôme ya beta étôtok e mevôm ya yôb été, 4 ane a nga nyoñe nkôñ w'adañe beéngel abim ane jôe a nga nyoñ d'adañedañe fe éndap.

Mon a dañe beéngel e nkôñ

(Besam 2 : 6-12 ; 45 : 7, 8 ; 102 : 25-28 ; 103 : 20, 21 ; 110 : 1 ; Yes 9 : 5)

5 Amu e be éngele mbé Zambe a tameya jô na,

“ O ne Mone wom,

Den, mamien me nga biaé wo?”

Nge na,

“ Mamien m'aye nye bo Esaa,

Nye ke a ye me bo mon ?”

6 Nalé fe na, éyoñ a nga zuu Ntôle mone wé e si bi too nyô, nye na,

“ Beéngel be Zambe bese be tame kañe nye.”

7 Mfa'a ya beéngel fe, a jô na,

“ Nyô a bo beéngel bé bivuñulu,

A bebobisaé bé nkaba'a nduan.”

8 Ve mfa'a Mon, a jô na,

“ Eto njôô jôé, A Zambe, é ne

nnôm éto a nnôm éto,

Rev. Matthias MEYE
Secrétaire Général 1961.....

a ntume zôsôô, ñwô ône ntum ya
éjôé jôé.

9 O nga nye'e Zôsôô, a ô nga vini
ébiasé memvinda ;
ajô ete, Zambe a nga wô'ô wo, e Zambe wôé,
a mbon mevak a dañe bemvôé bôé."

10 A na,
" Wo, A Nti, ô nga bôôé mbôka'a
ya si nyô atatat'a,
a yôb e ne mboane ya mo môé ;

11 Bi aye jañ, ve wo, w'aye langan ô too ;
bise bi aye yômbô aval ane ngômesan,

12 w'aye vute bie aval ane alô'ô
A bi aye veñesan aval ane alô'ô.
Ve wo, ô ne avale dada,
A mimbu miôé mi aye bo te man."

13 A e be beéngel mbé a nga tameya jô na,
"Tabe'e si e mbonnôme wom
Akekui m'aye bo besiñe bôé étele mebo jôé?"

14 Ye bese be nji bo minsisim mi
abo ésaé, b'alômbane na, be bo ésaé
ajô te b'aye nyoñe nyian?

Beta Nyian

(Behéb 1: 1-3; 4: 1; 12: 25)

Rev. Matthias MEYE
Secrétaire Général 1961.....

2 1 Amu ajô ete, bi ayiane tu'a kabetan a mam bi nga wôk, a za bo na, bi aye dutuban a lí'i me. 2 Amu na nge mejô me nga jôban a beéngel me nga yeme ngu, ane ntyaman atíñ ôse a mboane melo ôse bi nga tôbane zôsôa meya'an, 3 wôna bia bi aye fam aya, nge bi ayen aka'a beta nyian ete éñbwemese ? Nyian ôte Nti a nga taté kobô, a ba be nga wô'ô nye be nga yemete wô ngul e be bia, 4 éyoñe Zambe a nga bo ngaa a mendem, a bitua bi mam, a biwôlô mimboan mevale meva, a mimveane mi Mfufub Nsisim, aval ane nkômbane wé ô né.

Asuzo'ô ya nyian

5 Amu sa mfa'a beéngel ñwô Zambe a nga su'u si j'aye zu e si, nyô bi akobô je. 6 E nga kateban vôm éziñ na,

“ Môt a ne za jômô, ane w'asimesane nye ?

Nge mone mô, ane w'akale nye ?

7 O nga sili nye si tyôtyoé, beéngel be dañe nye.

O nga jalé nye ékat é ne étôtok a ésemen ;

8 O nga suu biôm bise, bi bo e mebo mé si.”

Amu vôm a nga suu baa biômô ase e si e be nye, a nji lí'i jôm éziñ, nje é nji suubane e si e be nye. Ve éyoñe ji, bi ngenan te tame yene baa biômô ase nsuubane e si e be nye. 9 Ve bi lô'ô Yésus, nyô a nga siliban e si tyôtyoé, beéngel be dañe nye, a jalébaneya ékat é ne étôtok a ésemen amu mintaé ya awu, nde, amu mvame Zambe, a ye tyé' awu amu ajô ya mô ase.

10 Amu nyô biôm bise bi ne amu jôé dé, a biôm bise bi too amu nye, éyoñ a lí'itane bon abui akui étôtok, e nga yiane nye na, a bo asuzo'ô ya nyiane wob mvo'é ése amu njibane mintaé. 11 Amu na, nyô a telé étyi, a ba b'atéleban étyi, bese be ne tine jia. Ajô te nde a ne te wô' ôson ya loene be na, bobejañ, 12 nye na,

“ M'aye kañete bobejañ jôé dôé,

M'aye wo yia bia ézezañ étôkan.”

13 Nalé fe na,

“ mamien m'aye tabe nye mebun.☒

Nalé fe na,

“ O lôô, me nyô, bia be bon be Zambe a nga ve ma.☒

14 Ajô te, amu bone bete be ne bonyoñe ngabe minsôn a metyi, émiene fe a nga nyoñe ngap ya été aval ete; nde ete amu awu, a ye te'elane nyô a bili ngul awu, e ne na, diable; 15 a na, a ye kôté ba bese be nga ko awu woñ nté ese be nga too ényoñe ya belo. 16 Amu e ne bebela na, a se ke jam d'anambe beéngel ve di d'anambe mvoñe bôt Abraham. 17 Ajô te a nga yiane funane bobenyañ mfa'a ya mam mese, nalé a ye bo ngule ya bo beta prêtre a ne mvam a nyô ya buni mfa'a ya ésaé Zambe, a bo metuna'a mfa'a mam abé ya bôt. 18 Amu vôm émien a ng awu mintaé éyoñ a nga yene meve'ele, a ne ngule ya volô ba b'ayene meve'ele.

Yésus a dañe Môze nkôñ

(Nlañ 12 : 7 Déut 4 : 5 ; Zak 6 : 12, 13 ; Mat 21 : 33-38 ; Behéb 1 : 2)

3 1 Ajô te, a mimfufub mi bobejañ, benyoñe ngap ya nloene w'aso e yôp, mi simesa'ane Yésus, Nlôman a beta prêtre ya mmemane wongan. 2 Nnye a nga bo nyô ya buni be nyô a nga télé nye, avale fe ane Môza a mbe e ngume nda wé été. 3 amu a nga yené na, a yiane dañe nyoñe duma adañe di Môze, ane nlôñe nda a bili ésemen a dañe nda. 4 Amu na, nda ése j'alôñeban a môêt éziñ, ve nlôñe biôm bise a ne Zambe. 5 Nde Môze a mbe fo'o nyô ya buni e ngume nda wé été ane mboésané, nde a ye bo nkañete ya mam me nga su'ulane koban; 6 ve Krist a mbe mon, nyô a jô nda jé, nda éte nje bi né, nge bi abi ayo'o nlem a ngunguan ya ndinleme jangam ngu.

Awo'an mfa'a bôte be Zambe

(Nlañ 14; Besam 78; 95: 8-11; 1 Kor 10: 1-12;)

7 Ajô ete, aval ane Mfufub Nsisim a jô na,

“ Den, éyoñ mi awô'ô tyiñe jé,

8 Te boane minleme mienan ayet ane éyoñ metyama'ane, ane môs mebôbela'a ya fé été.

9 Eyoñ bimvam bienen bi nga bôbôlô ma a ntye'an be nga tye'e ma, ja'a be nga yene mimboane miam nté mimbu mewôm menyin.

10 Ajô ete nde me nga yaa miaé bôt ôte,

A jô na, b'akob e minleme miab été kom ése, be nji ke yeme mezene mam.

11 Nalé ate me nga kan ngana ayaa dam été na,

B'aye bo ye nyin awo'an ndam été,”

12 Taba'ane ntye, a bobejañ, a za bo na, mbia nleme bisô a ya bo e be môêt éziñ ya be mia, ane mi ne ku a li'i vevea Zambe : 13 ve na, mi leba'an, wua a lebe nyô mbok môs ane môs, nté d'ajôbane na, den ; a za bo na, môêt éziñ ya be mia a ye bo ayet nlem amu medu'ane ya abé. 14 Amu na, bi nto benyoñe ngab bia be Krist, nge bi atu'a bi atata'a ya mbunane wongan ngul akekui asu'ulan : 15 nté d'ajôbane na,

“ Den mi aye wô'ô tyiñe jé, Te boane mileme mienan ayet, aval ane môse ya metyama'ane.☐

16 Amu na, beza be nga wôk ane be nga viane bo metyama'ane , Ye sa ba bese be nga kôlô Egipten a Môze ? 17 A beza a nga yaa be mimbu mewôm menyin ? Ye sa ba be nga bo abé, ane mimbim miap mi nga mane ku e fé été ? 18 A beza a nga kane ngana na, b'aye bo te nyin awo'ane dé été ? fo'o ve ba be nga bo melo. 19 Nde bi lô nda, be nga bo te ngule ya nyin été amu bisô.

4 1 Ajô ete, nkoane woñ, a za bo na, éyoñ ntiñetane ya ényiñ awo'ane dé été ô ngenan ô too, môť éziñ ya be mia a ye yené na, a kateya kui de. 2 Amu na, mbambe foé a nga kateban e be bia, avale fe ane e be be : ve mejô be nga wôk me nji volô be jôm, amu me nji lat a mbunan e be ba be nga wôk. 3 amu na, bia bi nga buni bi anyin awo'an ete été, aval ane a nga jô na,

“ Nalé ate me nga kane ngana ayaa dam été na,

B'aye bo te nyin awo'ane dam été.”

Akôsa bo bisaé bié bi nga mane boban aso mbô'ane ya si nyô. 4 Amu a jôya vôm éziñ ajô môse zañbwale avale dina na,

“ Ane Zambe a nga wo'an môse zañbwaale mfa'a ya bisaé bié bise.☒

5 A vôm nyina fe na,

“ B'aye bo te nyine awo'an dam été.☒

6 Ajô été, amu e ngenane na, bevo'o b'aye nyine de été, ba mbamba foé a nga kateban e be be melu mvus, be nga bo te nyin été amu melo, 7 nde a beta telé môse mfe, Den a kobô nalé anyu David melu ayap mvus, aval ane a te taté jô na,

“ Den nge mi aye wô'ô tyiñe jé, Te boane minleme mienan ayet.☒

8 Amu nge Yasua a too mane ve be awo'an, ve a nji ye kobô mvus éte ajô môse mfe. 9 Nalé ate awo'ane sabbat e ngenane mfa'a bôte be Zambe. 10 Amu môť a nyineya awo'ane dé été, nye fe a wo'aneya mfa'a ya bisaé bié, avale fe ane Zambe a nga wo'an mfa'a ya émbié. 11 Ajô ete bi tame suñe na bi nyiin awo'an ete été, nde môť éziñ a za ku amu aval melo été dada.

12 Amu mejô me Zambe me ne bevevee a fim, me ne akap adañe fansoñ é ne meyo mebaé, m'atulan akui m'asal ényiñ a nsisim, a bio a foñ bibaane, a m'ayemelan minsimesan a minvañe ya nlem. 13 Nde ététéa jôm éziñ é nji sobô asu dé ; ve mam mese me ne soé a nkulan e mise me nyô bi akobô nye nyô.

Yésus Beta Njô Bepêtre

(Behéb 2 : 17, 18 ; 9 : 11, 12, 24 ; 10 : 21-23)

14 Ajô été, vôm bi mbili beta njô beprêtre, nyô a tulaneya yôp nyô, Yésus Mone Zambe ntama biane mmemane wongan ngu. 15 Amu bi nji bi beta njô bepêtre a se ngule ya fulane bia ate'e dangan ; ve nyô a tôbaneya meve'ele mimfa'a mise avale fe ane bia, ve teke'e bo abé. 16 Ajô été, nsuba'an éto njôô ya mvam bebé a ayo'o nlem, nde bi ne kooban éngôngol a yene mvam ya volôban éyoñ ya ôsama.

(1 Mink 23 : 13 ; Besam 110 : 4 ; Behéb 2 : 17, 18 ; 4 : 15 ; 7 : 26-28 ; 8 : 3)

Rev. Matthias MEYE
Secrétaire Général 1961.....

5 1 Amu beta njô beprêtre ase a toban e be bôt, a telébane na a bo ésaé Zambe mfa'a bôt, a va'a mimvean a metuna'a amu mam abé. 2 Nyô a ne ngule ya bo nlem évôvoé mfa'a ya ba b'adimi mam, a ba b'akobe zen, amu

émiene fe a ne nka'an a atek. 3 nde amu jame dina, a yiane kee metuna'a ajô mam abé mé émien, avale fe ane ma me bôte mefe. 4 nde teke'e mô't a ye jalé émien a ésemen éte, ve éyoñ Zambe a loeneya nye, aval a nga bo fe Aaron.

5 Ajô ete nde Krist a nji ke wumulu émiene na a bo beta prêtre, ve a nga téléban a nyô a nga jô na,

“ O ne Mone wom,

Den , mamien me nga biaé wo ;”

6 aval ane a jô vôm mfe na,

“ O ne prêtre nnôm éto avale nkôñ Melkisédek.☒

7 Nny ate, melu a nga to minsôn été, éyoñ a nga mane ye'elan a ja'é, afulane beta beta miñyôn a milik, asu nyô a mbe ngule ya nyii nye akôlô awu, ane a nga wô'ôban amu nkoane Zambe woñe wé. 8 Akôsabo a mbe Mon, a nga ye'é mewôk a njiban a nga jibi mintaé ; 9 nde, éyoñ a nga boban nya mvo'é, a nga bo anjeñ ya nyian ya nnôm éto mfa'a ba bese b'abo nye mewôk. 10 vôm Zambe a nga télé nye njô bepêtre avale nkôñ Melkisédek.

Nleban ajô nkuane ya li'i mbunan

(1 Kor 3 : 1-3)

11 Mfa'a ya jame di, bi bili mam abui ya jô, a me ne ayaé ya fas, amu mi nto asu'u ya wôk. 12 Amu azukui éyoñe ji mi nga yiane bo beye'ele, ve mi ngenan mi ayi mô't éziñ a beta ye'ele mia metata'a me mam ya ajô Zambe. Mi ayi menyañ a sa bidi bi ne ayet. 13 Amu nyô ase a nyiñ a menyañ, a ne asu'u ya yem mejô me ne zôsôd, amu a ne nkeñelé mon. 14 Ve bidi bi ne ayet bi ne mfa'a benya bôtô, e be ba be maneya yembane bi fulu ya fiale jam e ne mvaé nge abé.

6 1 Jam ete nde, ntama li'ane meteta'a me mam ajô Krist, nkelan ôsu mfa'a ya éto benya bôtô, bi bo te beta bô'ô mimbôka'a nkôñelan nlem mfa'a ya biwuwua mimboan, nge wu ya mbunan mfa'a Zambe, 2 nge wu ya ñye'elan ajô minsôban a mbetane mo, nge wu ya ñwômelane miñwuan, nge wu ya ntyi'ane mejô ya nnôm éto. 3 Jam ete nde bi aye fe bo, nge Zambe a kañese. 4 Amu e vo'o bo na, ba be maneya faéban éfufub, be tye'eya fe mvean ô nga so yôp, a be bobaneya benyoñe ngabe Mfufub Nsisim, 5 a be tye'eya zam ya mejô me Zambe a ngul ya éyoñ j'azu, 6 nge be kuya nalé a li'i mbunan, e vo'o bo na, mô't a beta veñesane be, be bo mimfefé ane be ne kôñelan nlem, amu b'abeta tyelé Mone Zambe e krôa atyelé dap bebien, a samele nye. 7 Amu si j'anyu mveñ j'anoñ été biyoñ abui, j'afaa bilo'o bi avolô mfa'a ba mefup m'abéban, j'anyoñ ébotan e be Zambe ; 8 ve nge j'afaa élé bôngô a élo'o ndôé, é nto teke'e mfi a bebé ya nyoñe biyo'é ; asu'u lan ya été e ne na, é di'iban.

9 akôsabo bi akobô nalé, ve mfa'a wônan, A bôt bi anye'e, bi atu'a yem mbamba be mam m'alat a nyian. 10 Amu Zambe a nji bo aka' ékotekot éte na, a vaa ésaé jenane mis a nye'an mi nga liti amu ajô dé mfa'a ya bisaé mi nga bo mimfufub, aval ane mi ngenan mi bo'ok. 11 Ve bi ayi na, mô't ase ya be mia a liti avale mban ete, nde mi ne bi ngule nlem j'aso ndinlem akekui asu'ulan, 12 nde ete mi aye bo te bo minleles, ve bevuu benyoñe mintiñetan amu mbunan a ñwuane nlem.

Nya ntiñetane Zambe

(Behéb 10 : 23, 24, 32-36)

13 Amu Zambe, éyoñ a nga tiñeti Abraham, amu a nji bi nyô a dañe nye anen ane a ne kane nye, nde a kan émien
14 a jô na,

“ M’aye fo’o botane wo, m’aye fo’o fôlô wo.☒

15 Nde nalé ate Abraham, éyoñ a nga jaé jibi, a nga nyoñe jôm é mbe ntiñetan. 16 Amu bôt b’akane ba b’adañe be anen mengana, a ngan nje é ne nné ya mfeta’ane wop a yemete ajô. 17 Vôm ate Zambe, amu a nga kômbô tu’a liti benyoñe ngap ya ntiñetan ane ôyili vié ô vo’o selan, nde a nga jí’an ajô ete a nkanan ngana 18 na, zen ya mam mebaé me ne te selan, mme mete me vo’o bo na, Zambe a laa minsos été, bi ne bi beta mvolan nlem, bia bi maneya ke mimbil asoé bi ne ngul ya bo ngule minlem na bi bi ndinlem é ne bia ntelan ôsu. 19 Bi bili jame di ane atyi étyé ya ényíñ e ne di ya buni a ñyemane ngu, nde fe d’atulan éndelé ya vôm a ne étyi. 20 Vôm ate Yésus, asuzo’o wongan, a nyiineya amu ajô dangan, amu a nto njô bepêtre akekui nnôm éto aval nkôñ Melkisédek.

Nkôñ éto prêtre Melkisédek

(Met 14 : 17-20)

7 1 Amu Melkisédek ate, njô bôt ya Salem, e pretra Zambe a dañe mbetane yôp, a nga ke tôban Abraham a botane nye éyoñ a nga bulan a so’o ñwôéan a nga wôé bejô bôt. 2 Nnye ate fe Abraham a nga ve ngab awômô ya biôm bise. Osusua a ne njô bôt ya zôsôô, ane jôé éte d’asu’ulan; mvus éte a ne fe njô bôt ya Salem, e ne na, njô bôt ya mvo’é; 3 teke’e ésaá, teke’e nyia, teke’e éndan, nalé fe teke’e atata’a melu nge memané me ényíñ, ve a nga boban nyô a funane Mone Zambe. Môt a ne pretre kom ése.

4 Nde fomba’an abim éwôlô môat ate a mbe ! nyô Abraham, mvamba, a nga ve ngabe awômô ya biôm a nga sa. 5 Nde ba ya bone be Lévi, mmbe b’anyoñ éto pretre, be bili abendé na, be nyoñe ngab awômô e be bôt aval ane metiñ m’ajô, e ne na, e be bobenyañe bap, akôsabo be fe be ne ba be nga so e mimví’i mi Abraham. 6 Ve môat a nji lañ éndane jé é so’o be be, a nyoñe ngab awômô be Abraham, a botane fe môat a bili mintiñetan. 7 A teke’e bisô na, nyô a ne nsilane si a nyoñ ébotan be nyô a ne mbetane yôp. 8 Vana ngab awômô j’anyoñeban e be bôt b’awu, ve valé , e be nyô a ne nkañetane na, a vee. 9 Môat a ne fe jô na, ja’a Lévi émien, nyô a nyoñe ngabe awômô, a nga ya’ane ngab awômô amu Abraham, 10 amu a ngenan e mimví’i mi ésaá été éyoñ Melkisédek a nga ke tôbane nye.

11 Amu nge nya mvo’é a nga ye boban amu éto bepretre ya mvoñe Lévi, amu éyoñe jap nje bôt be nga nyoñe metiñ, jé be nga beta fe yi na, avale pretre afe d’atebe avale nkôñ Melkisédek, a bo te lobane jôé avale nkôñ Aaron? 12 Amu vôm éto pretre j’aveñesan, vôm ate fe metiñ m’ayiane veñesan. 13 Amu nyô b’ajô mam ma ajô dé a ne môat a so ayoñ afe, nde teke’e môat a so été a tameya bo ésaé altar. 14 Amu d’ayené ne ngeñ na, Nti wongan a nga so ayoñe Yuda, di Môze a nji ke kobô jam éziñ ajô bepretre. 15 E jame di d’adañe beta yené vôm pretre mfe a tebe a funa’an Melkisédek, 16 ntélan, sa aval ane mvinda j’asili nkalane ya abialé minsôn, ve aval ane ngul ya ényíñ é ne te wu. 17 Amu d’ajôban ajô dé na,

“ O ne pretre kom ése, aval nkôñ Melkisédek.☒

18 Mfa'a wuna, abendé d'ateleban e fefel amu e mbe atek, a te volô ; 19 amu metiñ me nji telé môť nya mvo'é ; mfa'a mbok, ndinlem j'adañ é sosya, nje bi asubu Zambe bebé.

20 Ve abime mboane dina e nji ke boban te nkanan ngana. 21 Ba be nga nyoñ éto pretre melu kôa teke'e kane ngana, ve nyôna a nga tebe a nkanane ngana na,

Nti a nga kane ngana na,

A ye bo te jôban e ôsimesane wé,

O ne pretre nnôm éto.

22 Abim été fe jame dina d'abo Yésus éban ya élat j'adañe mvaé. 23 Bepretre be ôsu be mbe abui mfa'a ya tañ, amu awu e nga kame be na be bo te langan be too éto pretre; 24 ve nnye, a bili éto pretre jé te akôñelan, amu a too nnôm éto. 25 Ajô ete nde a ne fe ngul kom ése ya nyii ba b'asubu Zambe bebé amu nye, amu a vee kom ése mfa'a ya bo ésaé mvañ ajô dap.

26 Amu aval njô bepretre ete e nga yiane bia, a too mfuban, te bijô, te mvin, nkandan a bebo abé, a mbetan w'adañe yôb ese. 27 Nje ate a nji yiane ve metuna'a môs ane môs aval ane bejô bepretre befe, ôsusua ajô mam abé map, wôna ajô mam abé me bôt; amu na, a nga bo jam ete abo dada, éyoñ a nga ve émien ane metuna'a. 28 Mvinda j'atelé bôt ate'e dab été, ane bejô bepretre, ve mejô ya nkanan ngana, mme me nga su'ulane so mvuse mvinda, m'atelé Mon, nnye a nga boban nya mvo'é nnôm éto.

Beta Pretre ya Mfefé Elat j'adañe mvaé

(Behéb 7: 15-28; 9: 6-12, 24; 12: 24)

8 1 Nde, nlô éfia ya mam bi ajô ma, ô ne na, bi bili aval njô bepretre ete, nyô a tebeya si e mbonnôm ya éto njô ya Nyô a ne Beta Etôtok e yôb été, 2 mboésaé ya vôm a ne étyi, e nya tabernakel été, nnye Nti a nga lôñ, sa môť. 3 Amu njô bepretre ase a teléban na a ve mimvean a metuna'a; ajô ete nde e nga yiane na, nyôna fe a bi jôm éziñ ya ve. 4 Nde nge a too bo e si nyô, ve a nji ke ye bo pretre, amu ba be ne été b'ave mimvean aval ane mvinda j'ajô. 5 B'abo biyeka'a a nsisiñ ya mfufube nda ya yôp, avale fe ane Môze a nga nyoñe nleban e be Zambe, éyoñ a nga zu lôñe tabernakel. Amu Zambe a nga jô na,

“ Fombô'ô ane w'aye bo biôm bise, fo'o ve ane éyeka'a é né, nje é nga litiban e be wo e nkôle yôp. ”

6 Ve éyoñe ji Krist a nyoñeya ésaé j'adañ mvaé é dañe nnôm élat, abim ane a nto ntebe zañe ya élat j'adañ mvaé, nje é nga boban a mintiñetan mi adañ mvaé.

7 Amu nge élat ôsu é nga ye bo te bijô, ji baa é nga ye bo te yen afôla. 8 Ayen a nga yene be too bijô, a nga jô na,

“ Mi lôô, melu m'azu, nalé nti a jô, Eyoñ m'atelé mfefé élat bia nda bôt Israëł, a bia nda bôte Yuda.

9 Sa aval élat me nga bo bia beésaa bap, Môs me nga bi wo na, Me liti be zen ya kôlô si ya Egipten;

Amu be nji je ke ôsu a élate jam, Nalé me nga bo te vô'ôlô be, nalé Nti a jô ;

10 Jina é ne élat m'aye bo bia nda bôt Israël mvuse melu mete, nalé Nti a jô ;

M'aye futi memvinda mam e minsisime miab été ; nde m'aye bo Zambe wop, A b'aye bo bôte bam.

11 A b'aye bo te ye'ele mô't ase ébemôtô, nge mô't ase monyañe wé na, Yeme'e nti, Amu bese b'aye yeme ma, Ataté nyô ntok, akui nyô nnen ;

12 Amu m'aye jamé bikotekote biap, a m'aye bo te fe beta simesane mam abé map ;”

13 Njôane wé ya na, mfefé élat, ñwô a boya wô ji ya ôsu nnôm a yômbô, nje é nto bebé ya jañ.

Mfufube nda ya si a wu ya yôp

(Nkôl 25 : 26 ; 40 : 17-33 ; Lévi 16 ; 1 Mink 23 : 13 ; Kol 2 : 16, 17)

9 1 Nde ja'an élat ya ôsu é nga bili fe memvinda ya nkañane Zambe vô'm ya étyi ya si nyô. 2 amu na, tabernakel a nga mane lôñeban, étun ya atan, nne étele lambe, a tawôlô, a fembé ya Nlitan, bi mbe été wôé, nnye a lobane na, Vô'm ya étyi. 3 Nde, éndelé baa e yat, étun éfe ya tabernakel é mbe fe wôé, é too jôé na, Etyi ya Bityi ; 4 nje é bili alter gôlt be nga bo be diki'i meyemete me ne mbamba menyum été yôp, a éwolo élat, nyañan a gôlt mimfa'a mise, nne vie'e gôlt ô nga ba'ale manna, a ntum Aaron ya ô nga faa, bifase meko'o ya élat, bi mbe été, 5 mfa'a ya yôp, bekerubim ya étôtok be nga buti éto éngôngo. Mfa'a ya mam mana, bi nji ke bi éyoñ ya ke bi aleñesan jam ése ya été va.

6 Nde, vô'm mam mete me nga mane kômbane nalé, bepretre b'anyiine kom ese e tabernakel, étun ya ôsu été, be bo'o bisaé ya nkañane Zambe. 7 Ve ji baa, njô bepretre étam a nyiin été anyiine da mbu ôse, sa momo, teke'e metyi, mme mete a ve amu ajô dé émien a di ya minkômbane mi bôte befe. E jame di nde Mfufub Nsisim a lit na zen ya nyiin e vô'm ane étyi a ngenane te tame litiban, nté tabernakel, étun ya ôsu é ngenan é tele vô'me wé. 9 nje éne éve'ela'a ya éyoñ mimbu ji. Aval ane nkômane wuna ô né, mivean a metuna'a bi aveban bi se ngule ya bo mone tyiña nlem mô't a kañ nya mvo'é, 10 Amu bi alate ve a bidi a binyunyui a minsôban mevale meva, mbie bi ne ve mintyi'an ya menyôl mi aveban akekui éyoñ ya nya nkômane mame.

11 Ve Krist, éyoñ a soya, a too njô bepretre ya mbamba be mam m'azu, a nga tulane tabernakel a dañ anen a mvaé, a too te mboan a mo, e ne na, sa jôm ya bi nga tébane bina, 12 ane a nga nyiin vô'm a ne étyi anyine dada, sa ke a metyi a bikabela a bone binyaka, ve a metyi mé émien ; nalé a nga bo nkôta ya nnôm éto. 13 Amu na, nge metyi bikabela a ma beyôm binyaka a fulane asup ya étoñe ngal ényaka, b'amiamé ba be mbe'e nsem, bi atune be ntunan w'abo minsôn mfuban, 14 abim avé metyi me Krist, nyô a nga ve émien e be Zambe a ngule Nsisim ya nnôm éto, a too nya mvo'é, m'aye fubu mone tyiña nleme wônan mfa'a ya biuwuwa mimboan, ane mi ne seéane vevea Zambe ?

15 Nde amu ajô ete, a ne ntebe zañe ya mfefé élat, nde ba b'aloban be ne ngule ya nyoñe komekoma ngab é ne ntiñetan, amu awu e maneya boban nde d'akôté be mfa'a ya mintyamane metiñ mi nga boban élat ya ôsu si. 16 Amu vô'm kalate élik a né, awu mô't a nga bo nye nde d'ayemete nye. 17 Amu kalata élik a yeme ngu, ve éyoñ mô't a nga bo nye a wuya : amu a nji bi ngul nté mô't a nga bo nye a ngenan a vee. 18 Nde fe, ja'an élat ya ôsu éte é nji ke

teléban, teke'e metyi. Amu éyoñ Môze a nga mane kobô abendé ese ya mvinda e melo me bôt, a nga bo a nyoñe metyi me bone binyaka a bikela, a nyoñe fe mendim mevule mintômba me ne évele, élé hisôp , a nga miame kalate émien a bôte bese, 20 nye na,

“ Mana me ne metyi ya élat, nje Zambe a bendéya mia.☒

21 A nga miame fe tabernakel metyi aval été, a mevie'e mese b'asaane me. 22 Nde, aval ane metiñ m'ajô, bébé biôm bise bi abo mfuban amu metyi, a nkulane metyi momo, njamane ke momo.

Mvasan abé amu metuna'a me Krist

23 Ajô ete, biyeka'a bi biôm ya yôp bi nga yiane fo'o tuneban a metuna'a mete, ve biôm ya yôp bibien bi nga yiane tuneban a metuna'a m'adañe malé mete mvaé. 24 Amu Krist a nga bo te nyiin vôm a ne étyi été, nnye a ne mboan a mo, éyeka'a ya nya jômô, ve a nga nyiin e yôb ebien été, nde a yené asu Zambe éyoñe ji amu ajô dangan. 25 Nalé sa fe na, a va'a émien mevee abui, aval ane njô bepretre a nyiin vôm a ne étyi été mbu ane mbu a éza metyi. 26 Nge nalé, a nga ye yiane wu mintaé mewu abui aso mbôka'a ya si nyô. Ve aval ane e ne éyoñe ji, a nga yené éyoñe jia mfa'a ya bise e mesondô'ô biyoñ, ane a ye vaa abé a metuna'a ya be émien. 27 Nde aval ane e ne ntelan e bôt na be wu éyoñe jia, mvus valé ntyi'ane mejô ô sooé, 28 aval été fe Krist, amu a nga ve émien avee dada, a be'e abé ya bôt abui, a ye yené ayené baa, sa fe amu ajô abé, ve ajô ya nyian e be ba b'ayange nye.

10 1 Amu aval ane mvinda é bili ve nsisiñ ya mabamba be mam m'aye zu, señe nya éve'ela'a ya bebela be mam, nde e vo'o bo na, aval metuna'a b'ave mban mban, mbu ane mbu, m'afubu ba b'asubu bébé nya mvo'é. 2 Nge be nga ye bo mvo'é nalé, ye be nga ye bo te jô'é ve bie ? Amu na, vôm bekañ be maneya bo mfuban éyoñe jia nalé, be nga ye jô'é nsimesan abé. 3 Ve e mveane metuna'a ôte été, nsimesane abé ô ne mbu ane mbu. 4 Amu e vo'o bo na, metyi beyôm binyaka a ma bikela me vaa mam abé.

5 Jam été nde, éyoñ a nga zu si nyô, a nga jô na,

“ Metuna'a a mimvean, ô nga bo te kômbô bie,

Ve nyôl ô nga kôm mfa'a wom.

6 Metuna'a b'adi'i nduan ngumba, a ma me ne amu abé, ô nga bo te yene me mvaé ;

7 Eyoñ éte me nga jô na, O lôô, m'azu, ane e ne ntilan mvulekane kalate été na,

Me bo nkômbane wôé A Zambe.”

8 Njôan a ndôme jô e yôb va na, metuna'a , mimvean, a bityi'a b'adi'i nduan ngumba a ma me ne amu abé, ô nji kômbô bie, nge yene bie mvaé, mbie b'ave aval ane metiñ,

9 mvus éte ô nga jô na,

“ O lôô, m'azu na, me bo nkômbane wôé.☒

Rev. Matthias MEYE
Secrétaire Général 1961.....

A vaa njôan ya ôsu, ane a ye yemete wu baa. 10 A nkômbane ôte ya mvean Yésus Krist a nga ve nyôle jé ave dada, bi maneya tuneban.

11 Nde pretre ase a tebe fo'ô môs ane môs, a bo'ô ésaé ya ve metuna'a avale da biyoñ abui, mme me vo'ô ke ve'ele vaa mam abé ngume mvaan. 12 Ve éyoñe Krist a nga mane ve avale metuna'a da mfa'a ya biyoñe bise amu mam abé, ane a nga tabe si mbonnôma Zambe, 13 wôna a yange akekui besiñe bé b'aye bo ételêmebo jé. 14 Amu a mveane wua, a maneya bo ba be ne ntunan nya mvo'é mboane ya kom ése. 15 Nde Mfufub Nsisim fe a kañete bia de. Amu na, njôan a taté jô na,

16 " Jina é ne élat m'aye bo a be

Eyoñ melu mete me lôteya, nalé Nti a jô:

Mvean m'aye ve m'aye futi metiñe mam e minlem miab été; mvus éte a jô na,

17 M'aye fe simesane mam abé map nge mimboane miab ne tya.

18 Nde, vôm mam mete me nto njaman, mvean ajô mam abé ô nji fe beta bo.

Nleban a ntyeñelan

(Yôh 14 : 6; Ef 2:13, 18; Behéb 3: 12-14; 4: 14-16; 6: 4-8; 12: 25-29)

19 Ajô ete, A bobajañ, amu bi bili ayo'ô nleme na, bi nyiine vôme ya étyi amu metyi me Yésus, 20 amu vevee a mfefé zen a teléya bia w'atulan éndelé zañ, e ne na, nyôle jé, 21 a vôm bi bili beta pretre a jônda Zambe, 22 nsuba'ane nye bebé a nlem ô ne bebela, a njalan ngule nlem j'aso e mbunan, minlem mi too bia mfuban mfa'a ya bijô bi mone tyiña nlem, a menyôle nsôban a mimfubane mendim. 23 Ntuka'a biane mmeman ya ndinleme jangan, te meñ, amu nyô a nga tiñeti, a ne nyô ya buni. 24 Mfoba'ane, ane bi ne fô'ô nye'ane ya bia bia a mbamba mimboan, 25 mbo'ane te jô'é nsula'ane wongan, ane éyem ya bôte beziñ é né, ve mi tebela'an wua a tebele'e nyô mbok, a dañe bo nalé abim ane mi lôô môs ôte w'azu bebé na.

26 Amu na, nge bi avañe bo abé, éyoñ éte bi nyoñeya ñyeman benya mejô, metuna'a mefe amu mam abé me nji fe beta bo, 27 ve angônda nyangan éziñ ya ntyi'ane mejô, a ayo'ô nduan j'aye di'i ba ya ngame yat. 28 Nge môt éziñ a biaséya metiñ me Môze, a yiane wu, te kooban éngôngo, amu anyu bengaa bebaé nge bela. 29 Abim avé mi asimesane na, môt a ye yiane dañe tôbane melep, vôm a tibiya Mone Zambe e mebo si, a yene metyi ya élat ane zesé jôm, mme mete a nga tuneban a me, a biasé Nsisim ya mvam ? 30 Amu bi ayeme nyô a nga jô na,

" Akuna'a e ne éndam, ma m'aye ya'an."

A beta fe jô na,

" Nti a ye tyi'i bôte bé mejô."

31 Nkuan ya ku e mo me vevee Zambe, ô ne angônda jam.

32 Ve simesa'ane melu mvus, éyoñ éte mi maneya faéban éfufub, mi nga jibi beta mewosan ya mintae. 33 Mfa'a wua mi nga bo jôme mekpwe'ela'a e minkomekan a bitibila'a été; mfa'a mbok mi nga bo benyoñe ngab ya ba be nga tôban avale mam ete. 34 Amu ja'ana ba be nga too mimbôk, mi nga wô'ô be éngôngo, a kañese fe e mevak nsaan be nga sa mia akum, amu mi nga yene na, mfa'a wônan mi bili akum d'adañe mvaé a di d'alibi. 35 Ajô ete, te wuan ayo'ô

Rev. Matthias MEYE

Secrétaire Général 1961

nleme denan e si, nde e bili beta meya'an. 36 Amu mbane njiban ñwô w'ayiane mia, nde vôm mi boya nkômbane Zambe, mi aye nyoñe jôm é ne ntiñetan.

37 " Amu mon étun éyoñ a ngenan,

Wôna nyô a zu a ye kui va, teke'e njiñelan.

38 Ve zôsôa môte wom a ye nyiñ amu mbunan;

A nge a bulane mvus, nleme wom ô nji yene nye mvaé."

39 Ve bia bi nji bo ba ya b'abulan mvus akui njañan, ve ba ya ba be bibli mbunan ya nyii ényiiñe jap.

Mbunan

(Besam 33 : 6, 9; Yôh 8: 56; 1 Pét 1: 8)

11 1 Nde mbunan ô ne ngugul mbôka'a ya mam môt a too me ndinlem, nkañesan a kañese mam me ne te yené.

2 Amu a wô bemvamba be nga boban bangaa.

3 Amu mbunan nde bi ayeme na mesi me nga téban a njôan Zambe. Ajô été biôm bi ayene bi, bi nji boban bi so'o e be biôm bi ayené.

4 Amu mbunan, Abel a nga ve Zambe metuna'a m'adañe mveane Kain mvaé, amu a wô a nga totebane na a mbe zôsôô, Zambe a nga bo ngaa vôm a nga kañese mimveane mié ; nde amu mbunan, akôsabo a wuya, a ngenan a kobôô.

5 Amu mbunan, Enok a nga beteban e yôb été, ane a ye bo te yen awu, a nga bo te beta yené, amu Zambe a nga bete nye e yôb été. Amu te yen a za betebane e yôb été, a nga boban ngaa na, Zambe a nga yene nye mvaé. 6 Nde , mbunan momo, môt a vo'o yené mvaé e be nye ; amu nyô ase a subu Zambe bébé a yiane buni na, a too, a na ane ñya'ane ya ba b'ajeñe nye. 7 Amu mbunan Nôa, éyoñe Zambe a nga lebe nye ajô mam me ngenan te tame yené, nde a nga bo mewôk, a lôñ ark ya nyii nda bôte jé. Nde a nga ve si nyôna mekua, a bo nyoñe ngabe ya zôsôô a so e mbunan.

8 Amu mbunan, Abraham, éyoñ a nga looban, a nga bo mewô'ô ya kôlô a ke vom a ye nyoñ ane ngap; a nga kôlô a ke, te yem mfa'a a ke. 9 Amu mbunan, a nga tabe e si ya ntiñetan aval ane nga a too éza si, a nga tabe e menda bindelé, baa Isaak a Yakôb, beébé benyoñe ngap ya ntiñetane ôte ; 10 amu a nga yange nlam ô bili mimbôka'a, ñwô Zambe a ne mbo éve'ela'a a nlôñ ya été. 11 Amu mbunan, Sara émiene fe a nga nyoñe ngul ya bo abum, éyoñ éte a lôteya miaé, amu a nga yen nyô a nga tiñeti a too nyô ya buni. 12 Ajô ete nde, e be môte wua ate, nnye a nto ane éwuwua, mvoñe bôt é nga bialé abui ane ateté ya yôp, ane nselek ô ne teke alañé ô ne nsa'a mañ.

13 Bôte bese be nga wu mbunan été, be ngenan te nyoñe mam me mbe ntiñetan, ve be nga yene me a sôô me ôyap, be nga meme na, be mbe beyeñ a bewulu dulu si nyô. 14 Amu ba b'akobô avale mam ete b'atu'a liti na, b'ajeñe si é ne énjap. 15 A nge be too beta simesane si be nga kôlô, be nga ye yen éyoñ ya beta bulan. 16 Ve éyoñe ji b'ayi si j'adañe mvaé, e ne na, nyô é ne yôb été. Jam été nde Zambe a ne te wô'ô be ôson, éyoñ a lobane na, Zambe wop ; amu a kômeya be nlam.

17 Amu mbunan, Abraham, éyoñ a nga tôbane meve'ele, a nga ve Isaak ane metuna'a, nyô a nga nyoñe nye mintiñetan, a nga kômesan ane a ye ve atyi'i mone dé, 18 di e nga jôban ajô dé na, Mvoñe bôte jôé j'aye looban e be Isaak : 19 a nga simesane na, Zambe a ne ngule ya wômôlô ja'ana mfa'a ya miñwuan ; ve ane éfunane jam, a nga beta fe nyoñe nye. 20 Amu mbunan, Isaak a nga ja'é bibotan ya melu ôsu mfa'a Yakôb baa Esau. 21 Amu mbunan, Yakôb, éyoñ a nga zu wu, a nga botane mon ase ya bone be Yôsef ; a nga ye'elan a ye'e sôso'o ya ntume wé yôp. 22 Amu mbunan, Yôsef, éyoñ éte asu'ulane dé é nto bebé, a nga tot akôlô ya bon be Israël ; ane a nga bendé ajô ya bivese bié.

23 Amu mbunan, Môze, éyoñ a bialéya, bebié be nga solé nye ngon éla, amu be nga yene na, a ne abeñe mon, a be nji ko mvinda njô bôte woñ. 24 Amu mbunan, Môze, éyoñ a nto nya môto, a nga bene loobane na mona ngone Faraô. 25 A nga viane tobe mbia éndeñela'a be be bôte be Zambe fufulu, a dañe na, a yen mvaé nté éziñ amu meva'a ya abé mme m'alôt, 26 amu a nga yen ôsone Krist ô too akum abui adañe bidima bi biôm ya Egipten; amu a nga lôbô meya'an. 27 Amu mbunan, a nga kôlô e Egipten, te ko ayaa njô bôte woñ; amu a nga bo mban, aval ane nga a lôô nyô a ne te yené. 28 Amu mbunan, a nga bo paska, a miame fe metyi, nde ntu'i mintôle mi bon a ye bo te nambe be. 29 Amu mbunan, be nga dañ Evele Mañ aval ane nge nya sii. Jam ete bôte ya Egipten be nga ve'ele bo, ane be nga viane jañesan. 30 Amu mbunan, meka'a meko'o ya Yérikô me nga ku si, éyoñ éte be maneya tyiñelane nye melu zañbwa. 31 Amu mbunan, Rahab minga bijabô, a nji jañ e nsamba bôt be nga bo melo, amu a nga nyoñe beloé si a mbamba nlem.

32 M'aye fe beta jô aya ? Amu éyoñ j'aye jembane ma, nge m'akañete ajô Gidéon, Barak, Samson, Yafté, ajô David baa Samuel a bekulumejô, 33 mbe bete amu mbunan, be nga dañe bijôé, a bo mam ya zôsôô, a nyoñe mam me mbe ntiñetan, a dibe menyu beñbweñbwem, 34 a dim ngul ya nduan, a fame meyo me fansoñ. Vôm be mbe atek, be nga bobane ngu. Be nga bobane biwôlô e bita, a tuli minsamba mewosane ya besiñe bap e fé. 35 Binga be nga beta nyoñe mimbim mi bôte bap amu ñwômelan, a ba bevo'o be nga ju'u mintaé, ve bene nyiiban, nde ete b'aye nyoñe ñwôman w'adañe mvaé. 36 Ba bevo'o be nga tôbane bikpwe'ele a mbibane minkasa, yaa, nalé fe mengata'a a nda mimbôk. 37 Be nga lumbane mekok; be nga si'iban bifas a zik; be nga wôéban a fansoñ; be nga ndeñe li a li, be be'e bikôp mintômba, nge bikôp bikela, be too ôsame, ntibelan, ñwuan ékpwe'ele, 38 mbe bete si nyô é nji ke yiane be. Be nga ndeñ é fé été, a e minkô, a e mimbase mekok, a e mefule me si.

39 Balé bete bese, akôsabo be nga bo bengaa amu mbunane wop, be nga bo te nyoñe jôm é mbe ntiñetan, 40 amu Zambe a nga bôndé jam d'adañ mvaé mfa'a wongan, nde, éyoñ bi mbe momo, b'aye bo te boban nya mvo'é.

Bôm bi Nti

(Besam 119 : 67, 71; Min 3 : 11, 12; 1 Pét 1 : 6, 7; Nkul 3 : 19)

12 1 Ajô ete nde bia fe, vôm bi ne mbôma'an a aka'a bizu'u bengaa di, mfinda'an mbe'e ôse a abé d'aji'a ndiñetane bia; mmata'an a mban mfa'a ya nsôngan ô ne bia ntelan ôsu, 2 bi lôbô'ô Yésus, asuzo'o a nsondô ya mbunane wongan, nnye ate, amu meva'a me mbe nye ntelan ôsu, a nga jibi krôa, mbiasan a nga biasé ôson, nde a tabeya si e mbonnôm éto njôô Zambe. 3 Amu na, tameka simesane nyô a nga jibi avale bisô beboabé bete be nga sôane nye, nde mi bo'o te tek, nge ku som minlem mienan été.

4 Eyoñ mi awosan abé, mi ngenane te wosane de akekui nkulane metyi, 5 nde ye mi maneya vuane ntebelan a nga tebele mia aval ane bon na

“ A mon, te yen mbôman Nti a bôme wo ane ngelé jam,

Nge kat, éyoñ a komekane wo ;

6 Amu nyô Nti a nye'e, nye ate a bôm

A mon ase émien a kañese, a bôme nye a minkassa.”

7 Mi ajibi, ane mi ne kômban ; Zambe a bo mia aval ane a bo bone bé. Amu na, mon mbé ésa a ne te kôm ? 8 Ve nge mi ne te kômban ane bone bese be ne benyoñe ngap, wôna mi ne bone ya mejian, a sa benya bonô. 9 Nalé fe na, bi nga bili beésa bangan ya minsôn, be bo be bômô bia, a bi nga bo bi sem'é be; nguma'ane ke Esaa ya minsisim, ye bi aye bo ye suu biabebien e si e be nye, a tabe ényiñ ? 10 Amu be nga bo be bôme bia abe melu éziñ, avale be nga yene mvaé ; ve nnye a bôme bia ndemben bi aye bo benyoñe ngabe ya mfubane wé. 11 Nkôman ôse ô nji taté yené ane jame mevak, ve di ya ôlun ; mvus éte w'awum ébuma mvo'é be ba be ne ébata'a ya tôbane wô, e ne na, ébuma zôsô.

12 Ajô été, yemeta'ane mo me ne ne jomelo, a meboñ me ne minte'an. 13 Tye'ane mezen ya mebo menan me bo zôsô, nde ete nyô a ne ñyeyem a ye bo te feneke, ve viane bo mvo'é.

Nleban ya bo te bene mvame Zambe

(Met 25 : 29-34; 27 : 30-38; 1 Pét 1 : 3-17; 3 : 11 , 12; Nkul 21 : 27)

14 Jeñane na mi taba bôte bese mvo'é; mi jeñe fe mfubane ntaban, nge ô ne momo, teke'e mô a ye yene Nti. 15 Mi momba'an , a za bo na, mô éziñ a ye kate nyoñ mvame Zambe; a za bo na, ndi ayôl w'aye faa, a ndeñele mia, a bôt abui b'aye ndaman amu wô; 16 a za bo na, nke mengam éziñ a ye bo, nge mbo ébiasé aval ane Esau, nnye a nga kuane éto ntôle jé amu adi bidi da. 17 Amu mi ayeme na, a nga benebane fe mvus éte, éyoñ a nga kômbô beta nyoñ ébotan. Amu akôsabo a nga jeñe je a mili'i mis, ve a nji yen afôla ya kôñelan nlem ;

18 Amu mi nganan te kui vôm jôm é ne namban, vôm nduan j'ayôñ, e évindi nkut, nge dibi, a mbia ôkôs, 19 e nkobô toñ nge tyiñ nje bew'ô be nga ye'elane na mefoé mefe me bo te beta kateban e be be. 20 Amu be nga bo te ngule ya jibi mvinda é nga vebane na, Ja'ana tit, nge j'anambe nkô, j'aye lumbane mekok. 21 Nde jôm be nga yen é mbe aka'a angôndô, ane Môze a nga jô na, Beta woñ a biya ma, a m'anyeñeban. 2 Ve mi kuiya e nkôle Sion, nleme vevea Zambe, e Yéroualem ya yôb été. A e be bizu'u beéngel ya ékôan abô'ô été ; 23 e be Kirke mintôle mi bon mi ne ntilan e yôb été, e be Zambe, nyô a ne Ntyi'i mejôa bôte bese, a e be minsisime bezôsô be bôt be maneya boban nya mvo'é ; 24 a e be Yésus nyô a ne Ntebe zañe ya mfefé élat ; a e be metyi b'amiam, mme m'akobô mvaé a dañ Abel.

25 Tuka'a fombane na, mi bo te bene nyô a kobô. Amu nge ba be nga bene mô a nga lebe mam e si nyô, be nga bo te fam, nguma'ane ke bia, ba b'abene nyô a lebe mam a too e yôb été. 26 Nnye ate, tyiñe jé é nga fô'ô si eyoñ éte. Ve éyoñe ji a maneya tiñeti a jô na,

“ Me ngenan afô'ô da m'aye beta fô'ô, sa si étam, ve nalé fe yôp.”

27 Ve éfia éte na, Me ngenan afô'ô da, j'asu'ulane na, biôm bi afô'ôsan bi aye veñesan, amu bi nga téban, nde ete biôm bi ne te fô'ôsan bi ne lí'i. 28 Jam ete nde, vôm bi anyoñ éjôé é se ngule ya fô'ôsan, mva'an akéva. Nalé ate bi ne saé Zambe ésaé a yene mvaé, a nkoane woñ a mfô'ôban ; 29 amu Zambe wongane fe a ne nduan j'atum .

Esaé Zambe a yen mvaé

(Mat 19 : 4-6 ; Rôm 12 : 10, 13, 15 ; 1 Tés 4 : 3-7 ; 1 Tim 6 : 6-10 ; 1 Pét 1 : 22)

13 1 Enye'esane bobenyañ ô kele ôsu. 2 Te boan ajô mba'alane beyeñ éñbwemesé ; amu zen éte nje bevo'o be nga tooé beéngel e nda, te yeme nalé. 3 Simesa'ane mimbôk, aval ane nge mi ne mimbôk, a ajô ba b'awu ékpwe'ele na, miabebiene fe mi be'e menyô. 4 Aluk e bo'o ésemen e be bôte bese, a énoñ aluk é bo'o fe te veban mvit : amu Zambe a ye tyi'i beke mangan a bebo mejian mejô. 5 Bo'ane binyiñe bienan nti mfa'a ya nye'ane moné. Yenan abime biôm mi bili ane di d'ayian : amu a jôya na,

“ M'aye ke jô'é wo nge lí'i wo.”

6 Ajô te bi bili ngunlenlem ya jô na,

“ Nti nnye a ne mvolô wom ; m'aye bo te ko woñ ;

Môt a ne bo me jé ?”

7 Simesa'ane betebe ôsu benan, ba be nga kate mia mejô me Zambe, mi fombô'ô ane ntabane wop ô nga su'ulan, mi vu mbunane wop. 8 Yésus a too avale da, angô'é, a den, a akekui nnôm éto. 9 Te dutuban a miñye'elan mi ne mevale meva a biye'an, amu é ne mvaé na, nlem ô bo ñyemetan amu mvam, sa amu bidi, mbie ba be nga tôñe bie be nga bo te yene mvolan éziñ été. 10 Bi bili altar, nnye ba b'asaé e tebernakel be nji bi ngul ya di été. 11 Amu mimbim betit mmbe metyi map m'abe'eban e mo me njô bepretre akui vôm a ne étyi ane metuna'a ya abé, m'adí'iban e minkan atan. 12 Jam ete nde Yésus fe, mfa'a ya tune bôte bé amu metyi mé émien, a nga wu mintae mbé ak'a ya nlam atan. 13 Nalé ate, bi tame kui atan, bi be'e ôsone vié. 14 Amu bi nji bi nname w'alibi va, ve bi adañe yi wu w'azu. 15 Ajô ete, bi tame ve Zambe metuna'a ya ékéña'a kom ése amu nye, e ne na, ébuma ya biyaé bi ameme jôé dé. 19 Ve te yenan mboan mvaé a nkabane mimvean éñbwemesé : amu Zambe a yen avale metuna'a ete mvaé.

17 Mi va'a betebe ôsu benan mewôk, a suu miabebien e si e be be, amu b'atabe ényiñe jenan évévé, ane ba b'aye yalan ajô ya été, nde be bo'o jam ete a mevak, a sa a ôlun, amu jam ete d'aye bo te volô mia.

18 Mi ye'elane ajô dangan ; amu bi too mebune na, bi bili mbamba mone tyiña nlem, bi kômbô'ô tabe mvo'é mimfa'a mise. 19 Ve m'adañe lebe mia na ; mi bo'o jam ete, ane me ne ji'a bulan e be mia.

Ntôtôô a mebatan m'asu'ulan

(Fil 4 : 21-23)

Rev. Matthias MEYE
Secrétaire Général 1961.....

20 Nde Zambe a ne mvo'é, nyô a nga bete éwôlô mba'ale mintômba akôlô miñwuan amu metyi ya élat ya nnôm éto, e ne na, Nti wongan Yésus, 21 a tuka'a kôme mia mfa'a ya mbamba jam ase na, mi bo nkômbane wé, a bo'o fe jam d'ayené mvaé e mise mé e be mia, amu Yésus Krist. Duma e bo'o e be nye, akekui nnôm éto . Amen.

22 Ve m'alebe mia, A bobejañ, na, mi jibi mejô ya ntebelane wu; amu me tiliya mia ve abe mejô. 23 Yemane na, Timôtéus, mojañ, a suubaneya; nge a nji so, m'aye zu yene mia bia nye.

24 Sila'ane me betebe ôsu benan bese, a mimfufub mise. Ba ya Italia be sili'i mia. 25 Mvam é bo'o e be mia bese. Amen.



Rev. Matthias MEYE
Secrétaire Général 1961.....